

DAISY KELLY

Naci 12 di Februari 1975

DESDE LONDON

KEN

Despues di a slaag na 1993 di Colegio Arubano, mi a bay Hulanda na unda cu na prome instante mi a ba pa studia Wiskunde na Universidad di Groningen. E prome aña na Hulanda tabata duro y mi a cambia dos biaha di estudio. Mi a purba 'kunstacademie' y finalmente mi a yega na International Business School (IBS) na Groningen unda mi a studia International Marketing and Management. E studie aki tabata perfecto p'ami ya cu el a permitimi di combina e aspectonan creativo y analitico di mi personalidad. Mi a haya un chens pa bai un aña afo pa mi estudio y hunto c'un grupo di bon amigo nos a scohe pa bai Parijs. Esaki tabata un di e highlights di mi bida, ya cu eyan mi a topa mi partner di 10 aña caba, Jean-Louis. Door di dje mi a dicidi di keda Europa y ta door di dje mi a termina na London den e sector financiero.

TRABOU

Mi a haya mi prome trabou na un compania Mericano haciendo onderzoek riba companianan di inversion Europeo y actualisando nan database. Awendia nan ta forma parti di Reuters. Hopi lihe mi a ripara cu mi por bay mas leu y mi a kita pa bay traha na un agencia Mericano renombrada den e sector di 'investor relations'. Aki mi a keda exponi hopi mas intensamente riba e sector financiero, trahando riba 'onderzoeksprojecten' pa clientenan grandi, manera KLM, Royal Dutch Shell, Koninklijke Ahold (Albert Heijn), Fiat, adidas, Capgemini, Heineken, Benetton y hopi mas. Despues di algun aña mi a tuma e decision di kita y bay traha pa Legal & General Investment Management (LGIM) caminda ainda mi ta awe. LGIM ta un compania Ingles activo den e sector di inversion, un di esnan mas grandi na Inglatera manehando mas di \$450 biyon di fondonan di inversion. Nos division na London so caba ta emplea mas di 500 hende. Mi ta

traha den e sales & marketing team como Marketing Executive. Mi rol ta principalmente pa maneha e interaccion y fluho di informacion entre nos sales teams y fund managers. Mi ta responsabel pa tur loke ta reporting di nos productonan di inversion, pa completa cuestionario y peticionnan di diferente organisacionnan financiero y clientenan existente of potencial. Tambe coordina nos actividadnan di advertising, incluyendo e aspecto creativo, pa coordina reunionnan interno y externo. Nos ta un team di 17 hende y contrario na otro lugarnan caminda mi a traha, ami ta e unico stranhero.

ARUBA TA DEN PLANNAN FUTURO?

Mi tin 7 aña caba aki y ainda mi no a fada. Tin asina hopi cos cu London por ofrece riba nivel profesional y cultural cu mi ta kere cu mi lo keda algun aña mas. London ta un bon hub tambe pa henter mundo cu hopi bon coneccion di vuelo na prijsnan hopi interesante y hunto cu mi pareha, nos ta probecha pa viaha y conoce otro lugarnan. Den e ultimo añanan cu a pasa, nos a haya e chens di cumpra y renoba dos cas na Francia tambe, uno cerca di Saint Tropez y un otro na un ski resort den Alpen, y awendia nos ta disfruta di esakinan asina cu nos por. Aruba semper ta den mi pensamentonan, pero por lo pronto mi tin un bida akinan. Mi no ta kere cu esey ta locual mi mama y mi tata a spera, pero semper nan a dunami tur sosten cu por tin. Mi ta zorg pa mi bay por lo menos un biaha pa aña cerca nan. Mi ta spera c'un dia mi lo por parti mi tempo entre Europa y mi dushi Aruba.

ARUBA AKI 5-10 AÑA

Mi ta bibando ya caba casi 14 aña afo y mi por bisa cu mi a ripara hopi cambionan na Aruba, no particularmente positivo. Antes Aruba tabata un berdadero 'One happy island'. Desafortunadamente, awendia Aruba tin problemanan serio cu

criminalidad y violencia. E top punt di esey tabata e caso tristo di Natalee Holloway. Ademá, pa algun aña caba mi a ripara cu tin un deterioracion di e nivel di servicio en general y tambe un cierto tension y hostilidad den comunidad vis-à-vis di stranheronan. Nos mester traha riba e aspectonan aki pa mantene Aruba su reputacion como un isla sigur cu hendenan alegre, acogedor y amabel. Aruba a conoce un progreso acelera despues cu Lago a cera y esaki tabata hopi positivo di un banda, pero te na ki punto e progreso aki no a perhudica nos balornan? Porta e falta di un vision a largo plazo a pone cu nos cultura y infraestructura a wordu afecta. Permitimi compara Aruba cu nos isla ruman Corsow. Su desaroyo tabata menos acelera cu di nos, pero awendia nan ta bezig ta 'catch up' hopi lihe cu nos. Algo hopi positivo na Corsow ta e concentracion cu tin riba renobacion y conservacion. Nos mester aprecia nos isla mas. Mi ta spera cu nos por cuminsa traha riba tur esaki awe y no aki 5 of 10 aña.

OPORTUNIDADNAN FINANCIERO NA ARUBA

Mi ta pensa cu tin un oportunidad pa desaroya e sector financiero na Aruba, particularmente pa loke ta trata e inversionista chikito, no solamente e negociante. Tin asina tanto producto di inversion riba mercado internacional cu aworaki no ta keda promovi na un manera activo of no ta disponibel riba nos mercado y cu por duna un rendement hopi interesante pa e Arubiano regular. Sigur, hopi di e productonan aki ta implica un riesgo financiero mas halto cu otro productonan mas tradicional manera depositonan na banco (spaarrekeningen), pero e ventahanan por ta hopi mas grandi y fructifero. ■